



Gabinete Wever - Croes II

ISLAONLINE

Noticia di Gobierno

2023

Diamars 20 Juni 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



Lidera door di Minister Plenipotenciario di Aruba, señor Ady Thijsen

DELEGACION DI ARUBA TA REUNI CU 'INSITUUT VOOR PUBLIEKE ECONOMIE'

Delegacion di Aruba, bou di encargo di Minister-President di Aruba señora Evelyn Wever-Croes y lidera door di Minister Plenipotenciario di Aruba, señor Ady Thijsen, ta participando na diferente reunion strategico den cuadro di Aruba su trayecto di recuperacion. Asina e biaha aki a reuni cu expertonan di 'Instituut voor Publieke Economie' e asina yama 'denktank' independiente. E instituto ta encarga cu duna conseho riba diferente tema manera maneho economico y maneho di prosupuesto.

Den cuadro di su recuperacion e tema di maneho financiero ta esencial pa Aruba su recuperacion. Adicionalmente por indica cu e meta di e instituto aki ta pa haci temanan financiero compleha, accesibel y transparente pa publico y pa asina contribui na e conocimiento colectivo di e tema aki.

Durante e reunion fructifero aki den presencia di director di Departamento di Finansa di Aruba, señor Derrick Werleman como tambe representante di Tijdelijke Werkorganisatie Aruba, señora Indra Zaandam, a para keto na diferente tema crucial relaciona cu maneho financiero. Den e caso aki a papia extensamente riba tema di supervision financiero y metodonan cu ta wordo aplica den contexto Europeo. Asina a papia di importancia di analisis solido y integral ora ta ehecuta supervision financiero como tambe e importancia di un enfoque amplio cu ta inclui crecimiento economico.



A para keto na e retonan cu estadonan chikito manera Aruba ta experiencia ora ta trata e tema financiero y importancia di aplica un acercamento na midi pa cu estadonan chikito. Es decir cualkier tema financiero lo mester wordo acerca for di e contexto aki pa por ta exitoso y efectivo. E delegacion di Aruba ta sumamente gradecido di por a intercambia punto di bista y lo sigui aplica e conocimiento.

Prome Minister ta gradici e delegacion di Aruba pa e trabounan cu nan ta bin ta haciendo den cuadro di e recuperacion di Aruba despues di e crisis di e pandemia y ta desea nan forsa pa continua cu e trabounan pa realisa e metanan cu exito.

Amber Sybesma Lead Content Curator EduCampus: **EDUCAMPUS TA CREANDO UN MAKERSPACE PA MUCHANAN TIN ESPACIO CREATIVO PA SIÑA**



EduCampus ta un di e scolnan cu a resulta ganador di e fondo di Edutech cual ta e proyecto di gobierno y Futura pa promove innovacion den enseñansa. Amber Sybesma Lead Content Curator na EduCampus a splica locual cu e scol ta haciendo cu e fondonan ricibi.

Algun siman pasa EduCampus a haya nan 'modular space' y awo ta bezig ta hinca tur e articulonan aden. Señora Sybesma a splica cu den esaki lo kier crea un Makerspace pa e muchanan tin un espacio pa nan crea y experiencia e proceso di diseño. No solamente diseño di moda, pero tur tipo di diseño y pa nan tin un "immersive experience". Ademas, kier yena e espacio



cu diferente articulo innovador pa e muchanan trece tur nan mihor ideanan na bida creando nan prototipo y asina nan lo pasa den tur e fasenan cu tin ora cu ta crea un diseño.

Tur esaki ta posibel a traves di e fondonan cu a ricibi a traves di e proyecto Edutech di gobierno y Futura.



Prome Minister Evelyn Wever-Croes:

UNION EUROPEO TA FINANCIA 1.7 MIYON EURO PA E PROYECTO EARLY WARNING SYSTEM

“Preparacion ta e miho forma pa sali y recupera di cualkier calamidad”

Diamars mainta, a tuma luga na Bureau Rampenbestrijding Aruba (BRA), e Workshop Early Warning system na unda cu lo tin training y preparacionnan di e sistema nobo aki. Prome Minister tawata presente hunto cu Crisis Team y den nomber di Gobierno di Aruba y di Aruba a gradici BRA pa tur e trabounan cu nan ta haci y ta felicita nan pa logra obtene e Sistema nobo, e Early Warning System. Prome Minister a desea BRA y profesionalnan di Crisis Team exito den e dos dianan di workshop.

Prome Minister den su palabranan di discurso, a expresa na e Crisis Team su gratitud pa e trabounan haci durante e pandemia. Especialmente, e forma cu nan a siña Prome Minister e miho manera pa recupera despues di cualkier calamidad, ta pa ta bon prepara. Esaki sigur ta bin cu un bon sistema cu ta duna alerta di eventualidadnan.

BRA pa hopi tempo a expresa e deseo pa Aruba tin e sistema Early Warning System, cu lo yuda anticipa riba calamidadnan mas tanto posibel. E sistema científico aki ta analisa fenomenonan pa asina yega na conclusionnan y duna avisonan trempan di calamidadnan na caminda. E importancia di esaki ta cu e avisonan aki ta yega tur caminda por lo tanto e avisonan lo mester bin den tur idioma y forma posibel na Aruba, te hasta ora un persona ta den mondi, y no tin accesibilidad na comunicacion, e tambe por haya e informacion aki. E sistema ta un guia tambe pa haci e proceso di evacuacion mas facil of pa tuma medidanan di precaucion. E meta ta pa tin mas seguridad y scapa bida di hende y minimalisa e dañonan pa asina haya e forsa pa recupera bek. Esfuersonan ta wordo haci pa logra un Aruba mas resiliente contra cualkier calamidad. Awo, a logra cu fondonan di Union Europeo, pa esaki bira realidad.

BRA a inscribi na Union Europeo pa e proyecto aki. Pa haci peticionnan na Union Europeo no ta facil pasobra tin masha hopi burocracia y ta complica. E noticia a drenta cu Union Europeo ta financia 1.7 miyon Euro pa e Proyecto Early Warning System. Cu esaki, Aruba ta bira un pionero den Caribe, un role model pa otro paisnan den Caribe. Nacionnan Uni ya a stipula cu dentro di 5 aña tur pais den Caribe mester tin un Sistema asina y Aruba ta canando adelanta den esaki.

“E echo cu nos a logra esaki, ta bisa hopi di nos. E dedicacion y profesionalismo di BRA y Crisis Team, sigur ta loke a yuda pa haci esaki posibel. “Den nomber di Gobierno di Aruba, y di pueblo en general, mi ta gradici boso pa tur e trabounan cu boso ta haci pa logra esaki. Preparacion ta e miho forma pa



sali y recupera di cualkier calamidad”, Prome Minister Evelyn Wever-Croes a expresa.

Early Warning System, lo ta completamente operacional pa juni di 2024 caba, mientras lo ta preparando tur ciudadano di nos pais y duna splicacionnan necesario pa esaki ta exitoso.

Prome Minister Evelyn Wever-Croes:
Riba remarce di señora Alejandra Forero durante Conferencia di
Prensa Hubenil 2023,
PROME MINISTER A EXPRESA DI TA UN GRAN
HONOR PA INSPIRA MUCHANAN MUHE PA NAN
DESEA DI BIRA PROME MINISTER DI NOS PAIS



Siman pasa diahuebs, a tuma luga e di tres seccion di Conferencia di Prensa Hubenil 2023, Periodista pa un Dia. E biaha aki, e periodista invita ta señora Alejandra Forero di TeleAruba. Desde 2011, Alejandra ta forma parti di nos comunidad y a traha pa radio y television local. Actualmente, Alejandra ta traha na nos planta di Television Nacional TeleAruba den su programa Primera Plana con Alejandra Forero, como periodista y presentadora.

Señora Alejandra pa cuminsa, a felicita Gobierno y Prome Minister Evelyn Wever-Croes pa e programa interesante y importante, 'Periodista pa un Dia'. Esaki, Alejandra a remarca, ta habri espacio tanto pa nos muchanan siña mas di e trabou di periodismo como e trabou di Gobierno y dene caso aki tambe, e trabou di Prome Minister.

Manera e 6 muchanan, Alejandra a haya e oportunidad pa dirigi su mes na Prome Minister remarcando cu, door cu Aruba tin su prome Prome Minister femenino den historia di Aruba, esaki sigur ta algo cu ta podera y incentiva muchanan muhe, y ta inspira nan pa nan tambe desea di bira e 'MinPres' di nos pais.

Prome Minister a gradici Alejandra pa su palabranan y a expresa cu ta cu gran honor e ta ocupa e funcion di ta e Prome Minister di nos pais y tin e speranza di ta inspira tur hende muhe riba nos pais, muchanan chikito te adultonan, cu kico cu nan propone nan mes, nan por logra. "No laga niun hende bisa bo cu bo no por logra pasobra bo ta un hende muhe of un mucha muhe. Ami ta kere den e balansa. Mi ta kere cu e hende muhenan tin mester di hende homber pa engrandece nos pais



mescos cu e hende homber mester di e hende muhe pa haci nos pais mas fuerte. Hunto nos mester logr'e. Pero no tin nada cu nos no por logra simplemente pasobra nos ta hende muhe", Prome Minsiter a remarca.

Esaki, Prome Minister a enfatisa, ta conta pa tur cos, den estudio, trabou y tur otro situacionnan dificil of facil. "Mi ta spera cu realmente mi por inspira hende muhe y muchanan muhe den esaki. E funcion ta bin cu su responsabilidadnan y como hende muhe, mester percura pa tur cos bay bon pa niun hende bisa cu hende muhe no por haci e trabou aki", Prome Minsiter a enfatisa.

Prome Minister ta gradici tur esnan cu a haci 'Periodista pa un Dia' posibel y un exito. Danki tambe na Alejandra Forero pa su tempo pa splica nos muchanan mas di e trabou aki. Danki na e mayornan pa permiti nan yiunan participa y danki special na nos muchanan cu a participa.

Prome Minister Evelyn Wever-Croes: ENSEÑANSA PA EMPLEO (EPE) CU MAS OPORTUNIDAD PA COMUNIDAD

**Pronto lo habri oficialmente e facilidadnan nobo pa brinda mas
posibilidad pa e mercado laboral**



Prome Minister Evelyn Wever-Croes hunto cu Minister di Labor Glenbert Croes y miembronan di Parlamento Alvin Molina y Ricky Hoek a bishita Enseñansa Pa Empleo (EPE) pa un recorrido di e facilidadnan nobo. E proyecto aki no ta cla ainda, pero por mira caba e joya di proyecto, na unda tin varios localidad, cu lo ofrece oportunidad na un cantidad grandi di alumno pa sigui diferente curso.

Prome Minister a indica cu tin dos klas basta particular. Un di e localidadnan ta ofrece curso di bartender, y por a mira e muchanan di muchila creativo cu ta bishitando EPE na mesun momento, trahando "mocktails" cu ta un cocktail sin alcohol. E ta bunita pa wak e muchanan special aki cu talbes no tin e capacidad pa siña otro cos, por muestra nan habilidad di por traha den area di bartending. Esaki sigur ta di aplaudi, ya cu EPE no tey pa sirbi esnan cu kier un mihor trabou so, sino ta sirbi comunidad den su totalidad. E otro localidad ta pa esnan interesa den e area di casino, na unda tin diferente mesanan disponibel pa e alumnonan por practica e ofishi di "casino dealer" di biaha.

E proyecto aki sigur ta uno di gran beneficio pa comunidad, specialmente den e momentonan aki cu Aruba ta den pleno recuperacion. Tin hopi necesidad y demanda pa trahado, y aki



sigur ta ofrece diferente curso necesario pa yuda esnan cu ta interesa pa avansa den nan trabou actual of esnan cu kier cuminsa den un area di trabou nobo.

"Mi ta gradici Minister Glenbert Croes pa su vision y determinacion pa "upgrade" e facilidadnan di EPE. Tambe, un pabien na tur esnan cu ta traha na EPE y cu a haci e proyecto aki posibel. Nos lo keda warda ansiosamente pa ora e facilidadnan aki habri oficialmente" Prome Minister a expresa.

Continuacion ENSEÑANSA PA EMPLEO (EPE) CU MAS OPORTUNIDAD PA COMUNIDAD....





CURSO FINANZAS DEN MI HOGAR A YEGA SAVANETA



E curso Finanzas den mi Hogar a start na districto di Savaneta. Durante 4 siman cada participante lo ricibi e guia y conocimiento pa tuma decisionan financiero cu impacto positivo riba nan bienestar. Banda di ricibi e material necesario manera entre otro pen, etui y un calculator, cada participante lo ricibi tambe un certificado di participacion. E curso aki ta ser ofreci completamente gratis.

Educacion financiero no ta un luho, pero un necesidad. Sondeo di Banco Central di Aruba ta muestra un desaroyo preocupante: di cada 10 hogar, 3 hogar ta gasta mas di nan entrada tur luna. Esaki ta nifica cu tin hogarnan riba nos isla cu cada luna tin e reto di cumpli cu tur necesidad y responsabilidad financiero manera e.o. gasto pa vivienda, cuminda, y prestamonan personal.

Pa duna un apoyo na nos ciudadanonan riba maneho di finanza, minister Geoffrey Wever hunto cu Fundacion Plan di Bida a organisa e curso Finanzas den mi Hogar den tur districto

di Aruba. Despues di Paradera, San Nicolas, Oranjestad awor ta districto di Savaneta su beurt.

Den e prome sesion a enfoca riba con por ta efectivo den cas door di wak con por spaar y cumpra sin emocion. Cu subida di prijsnan internacional di productonan cu ta afecta e prijsnan di nos productonan ta importante cumpra consciente y crea e espacio pa spaar aunke ta un tiki. Esaki por contribui na sea mas consciente di e balor di cada florin.

"E interes demostra di nos ciudadanonan ta muestra cu ta hopi importante pa gobierno facilita e guia y conocimiento na nos ciudadanonan y asina duna un contribucion importante na desaroyo personal di cada uno y nos pais", segun Minister Geoffrey Wever.

Minister Geoffrey Wever ta desea cada participante hopi exito durante e diferente sesionan cu lo trata topiconan cu lo contribui sin duda na un maneho responsabel di nos cartera.



TA HACI UN YAMADA NA TUR ESNAN CU TIN UN BOET HABRI PA PAGA ESAKI



Recientemente, Ministerio Publico hunto cu CEA a inicia e accion pa asina por cobra e boetnan cu tin habri. A base di esaki a tuma nota di diferente pregunta y preocupacion cu a bin di parti di pueblo pa cual Minister di Husticia y Asuntonan Social sr. Rocco Tjon a duna su reaccion.

Manera ta conoci siguridad den trafico ta algo sumamente importante, mas y mas pueblo mes ta pidi pa trece mas siguridad den trafico. Pa e motibo aki, tin diferente iniciativanan den pleno ehecucion pa percura cu esaki por ta e caso. Un di nan ta pa percura cu esnan cu comete un infraccion den trafico paga e boetnan pa cu esaki. Ta asina cu actualmente tin ocho mil caso cu ya caba tin un sentencia, sinembargo, e personanan cu a comete e infraccionnan aki, ainda no a paga pa esaki.

Pues di e ocho milnan aki, 2500 persona a ricibi dos recordatorio caba pa haci e pagonan aki, pero mirando cu e pagonan no ta tumando luga, a dicidi pa inicia cu e accion aki. Di e forma aki, ta percura cu e personanan cu a comete e infraccionnan aki ta para responsabel y ta cumpli cu e sentencia cu a wordo dicta door di hues. Asina por bisa cu banda di e otro iniciativanan manera concientisacion y prevencion, cual Cuerpo Policial ya

caba ta dunando hopi atencion, ta percura tambe pa eleva siguridad di trafico a traves di e accion aki.

Dentro di poco, Gobierno di Aruba lo inicia cu un proyecto pa loke ta autonan cu no ta segura, caminda lo bay apunta un tercer partido pa maneha e parti cu ora ta kita un auto for di caminda, esaki por wordo poni na un luga specifico. Di e forma aki ta percura cu mas y mas Cuerpo Policial por kita autonan for di caminda cu no ta cumpli cu tur e rekisitonan manera e parti di seguro. Cifranan cu a ricibi ta muestra cu un gran parti di tur e accidentenan cu ta tuma luga, ta envolve autonan cu no ta segura, cual ta afecta e siguridad den trafico pero tambe tin consecuencianan financiero pa esnan cu ta involucra den e accidentenan aki.

Pues pa loke ta trata e accion di Ministerio Publico conhuntamente cu CEA, Ministerio di Husticia y Asuntonan Social ta haci un yamada na tur esnan cu ya caba tin e sentencia y a haya e recordatorionan pa paga esaki, pa haci esaki lo mas lihe posibel. Esaki por wordo paga na Ministerio Publico of na warda di polis na San Nicolas cu carchi, of por haci e pago online.

Minister Rocco Tjon:

DRH Y KPA TRAHANDO CONHUNTAMENTE RIBA E REORGANISACION DI CUERPO POLICIAL

Siman pasa, Minister di Husticia y Asuntonan Social sr. Rocco Tjon, a tene un reunion sumamente positivo hunto cu DRH y KPA, caminda a delibera e direccion di Cuerpo Policial, pa loke ta trata nan reorganizacion. E meta ta, pa logra finalisa esaki pa fin di aña, y loke lo tene cuenta cune sigur ta e echo cu e funcionnan mester ta mas flexibel pa asina por duna e Agentenan Policial mas espacio pa sigui crece, pues amplia nan carera. Den e reorganizacion aki tambe ta tene cuenta cu e diferente proyecto y procesonan cu ta den pleno ehecucion, manera Family Justice Center y Operation Command Center na Savaneta.

Manera ta conoci algun tempo atras a emiti e “position paper” caminda Alto Comisario a splica e enfoke cu ta bay tin pa loke ta Cuerpo Policial, y esaki ta cuadra cu e punto di salida pa loke ta e “beleidsvoornemens” di Ministerio di Husticia y Asuntonan Social. Diferente inversionnan ta tumando luga den Cuerpo Policial, principalmente den e parti di material, pero tambe den aspectonan infraestructural, pa crea e condicionnan di trabou adecuado pa e Agentenan Policial. Mas importante cu esaki ta pa percura cu e structura di e organizacion por coincidi cu e demanda cu tin riba Cuerpo Policial, pa loke ta combati criminalidad.

Banda di esaki, lo duna atencion tambe na procesonan pa fortifica “bedrijfsvoering” y “personeelszorg” cual ta sumamente importante pa e proceso primario di e organizacion. Polis di bario lo wordo miho ekipa, pero tambe un departamento di informacion y inteligencia mas amplio cu mas posibilidad. Mirando e diferente desaroyonan den cuadro di seguridad na nos frontera tambe ta tene cuenta cu palabracionnan cu tin haci pa por brinda Arumillers, cu ta personal bon ekipa, un espacio den e organizacion di KPA.

Por ultimo, e mandatario a indica cu e meta di e reorganizacion ta pa haci Cuerpo Policial un organizacion mas agil pa por combati diferente fenomenonan di criminalidad, y na mes momento brinda mas perspectiva na nos Agentenan Policial. Dentro di poco DRH conhuntamente cu un ekipo di KPA lo bay Hulanda pa haci un bishita di trabou pa wak principalmente e parti di e carera di e Agente Policial na Hulanda y wak con por aplica e sistematica aki na Aruba tambe.





MIINISTER ENDY CROES TA GRADICI Y FELICITA SR. RANDY TROMP PA SU DEDICACION Y PROFESIONALISMO DEN ENSEÑANSA NA ARUBA



Recientemente, Minister Endy Croes a ricibi bishita di Sr. Randy Tromp. Sr. Tromp a inicia cu su carera dia 1 di augustus 1997 como docente di electro y natuurkunde na MTS. E mesun aña Sr. Tromp a cambia di MTS pa EPI C&T. Despues di 7 aña Sr. Tromp a solicita y bira opleidingsmanager na unit C&T.

Pa 3 aña caba Sr. Tromp ta den e directiva di Colegio EPI y awo ta invaller pa e posicion di unitmanager na unit S&S. Minister Endy Croes ta gradici y felicita Sr. Randy Tromp pa su dedicacion y profesionalismo den enseñansa na Aruba.





GOBIERNO DI ARUBA A RECONOCE BRAINER LAMPE, GERALD MORETA Y DISJONRICK JACOBS PA NAN HAZAÑA DEN E 31 EDICION DI RONDE VAN ARUBA



Recientemente, den un esfera ameno Minister Endy Croes y Prome Minister Evelyn Wever - Croes a ricibi Brainer Lampe, Gerald Moreta y Disjonrick Jacobs. Manera ta conoci, na luna di mei ultimo den e 31 edicion di Ronde van Aruba e duo atleta Brainer Lampe y Gerald Moreta a haci Disjonrick su soño bira realidad pushando su "race cart" durante e careda. E atletanan a duna tur di nan mes pa completa e 72 km exitosamente.

E idea di esaki a bin di Disjonrick mes pa muestra tur hende cu limitacion fisico no mester ta un impedimento pa logra metanan asina y manera Disjonrick mes ta bisa nada ta imposibel. Disjonrick a celebra 19 aña dia el a bishita e ministernan. Minister Endy Croes y Minister President Evelyn Wever – Croes tabatin e honor di canta "happy birthday" cune. E atletanan Brainer y Gerald a expresa di ta hopi emocionada cu e reconocimiento di ta un inspiracion pa Aruba. Pa nan training hunto cu Disjonrick ta algo normal, pero pa mira cu mas hende y ministernan ta reconoce e acto aki, ta duna nan un sentimento di gratificacion y estimulo pa sigui pusha y duna tur di nan mes pa continua cu e deporte importante aki.

Finalizando, Minister Endy Croes ta gradici Brainer y Gerald pa cumpli cu Disjonrick su deseo y pa ta un inspiracion y motivacion pa haci un diferencia, no solamente den bida di Disjonrick, pero tambe den bida di tur esnan cu ta sigui nan pasonan di cerca. Cu disciplina, deseo, dedicacion y determinacion boso a logra.



MINISTER ENDY CROES A REUNI CU E TEAM DI FUNDACION MUCHILA CREATIVO

Recientemente, Minister di Enseñansa y Deporte Endy Croes a reuni cu presidente di Fundacion Muchila Creativo Sra. Rose-Marie Provence y Sra. Emerita Emerencia y Sra. Nancy Maduro cu ta forma parti di e team. Fundacion Muchila Creativo ta funda na aña 2003, cu 18 aña di existencia e fundacion ta para pa hopi mas cu arte. E mision di Fundacion Muchila Creativo ta pa orienta y motiva mucha hoben y adulto pa ta creativo. Pa medio di lectura, tayer y curso Fundacion Muchila Creativo ta yuda nan pa desaroya habilidad den e campo di musica, baile, arte visual, teatro, literatura, multimedia y arte den general.



Durante e reunion a elabora riba e "huurovereenkomst" cu nan tin cu Fundacion Cas Pa Comunidad Arubano (FCCA). A dialoga riba diferente punto di atencion cu nan a trece dilanti. E proyecto ta den proceso y ta sperando riba un conseho final di Directie Wetgeving en Juridische Zaken (DWJZ). Tambe a trece nan plan nobo dilanti,


cual ta trata di un "leerwerktraject" pa e muchanan cu termina un estudio di 3 aña. Ta trata di un estudio pa muchanan special di e edad di 16 pa 25 aña, cual juli proximo ta finalisa. Banda di esaki, nan a trece diferente punto di atencion dilanti, cual ta trahando pa resolve.

MINISTER ENDY CROES A REUNI CU DIRECTIVA DI CLUB ESTRELLA



Recientemente, Minister di Enseñansa y Deporte Endy Croes a reuni cu directiva di Club Estrella. Durante e reunion nan a presenta nan deseo pa construi un afdak pa e cancha di basketball na Club Estrella. Parti mainta tin diferente scol den vecindario por haci uzo di e cancha pa haci gym, entre otro, Colegio San Jose, Colegio San Antonio y Maria School y den transurso di atardi tin rond di 200 mucha di diferente club di e deporte di basketball cu ta haci uzo di e cancha.

Pa evita di expone e muchanan demasiado den solo, e directiva di Club Estrella a presenta Minister Endy Croes nan plan pa construi un afdak y a trece oferta di diferente compania. En bista cu e aña aki na september Club Estrella ta cumpli 75 aña di existencia, Minister Endy Croes indica cu e ta bay evalua e ofertanan y dentro di un luna ta duna un decision final.





NOS TA IMPRESIONA CU E FACILIDADNAN NOBO DI ENSEÑANSA PA EMPLEO



Minister Glenbert Croes acompaña pa Prome Minister Evelyn Wever-Croes y miembronan di Parlamento Alvin Molina y Ricky Hoek a bishita Enseñansa pa Empleo (EPE), pa un recorrido di e facilidadnan nobo.

Minister Croes a expresa “cu ta cu orguyo nos ta mira e EPE nobo. Enseñansa Pa Empleo haya su facilidad y ekiponan nobo pa asina e ta e instrumento di capacitacion pa yuda nos trahadornan haya un miho oportunidad den e mercado laboral actual. Nos hobennan y nos Grandinan tambe ta haciendo uzo di e oportunidad di cursonan di EPE pa nan tambe progreso cu e progreso economico cu Aruba ta bibando.”

E mandatario ta sumamente orguyoso di tur e empleadonan y instructornan cu ta yuda cu cursonan di dia y anochi pa asina acomoda tur esnan interesa den capacita nan mes. Tambe ta gradici comunidad completo y organisacionnan pa e confiansa cu nan ta pone den EPE pa guia nan empleadonan, dunando nan e instrumentonan necesario pa por sigui crece den nan posicion actual.

E mandatario a indica di ta contento di a haya e oportunidad, como Minister di Labor, di tin EPE na su encargo, mirando cu nan tabata deliberando si lo sigui opera. A logra inverti den un EPE cu facilidadnan nobo y sigur hopi mas motivacion di empleadonan pa brinda cursonan pa tur trahado cu kier avansa



den nan carera.

"Mi kier encurasha tur esnan cu ta desea di tin un mihor trabou, of esnan cu ta desea di avansa den nan trabou actual pa bin inscribi na EPE pa asina nan por sigui e cursonan necesario pa por cumpli cu nan deseo di tin un mihor futuro" Minister Croes a termina bisando.

Ni kico opositornan bisa:

ARUBA HYDROGEN VALLEY TA BIRA REALIDAD



Despues di lesa e noticia cu Hulanda y Spaña a firma acuerdo riba transicion energetico pa Hidrogeno, esaki a confirma na Minister Glenbert Croes, cu e caminda di liderazgo cu Aruba a encamina pa haci e transicion energetico pa energia limpi, ta e caminda corecto.

Aruba ya a busca acercamiento na Hulanda. Tur hende por corda e bishita di trabou cu e mandatario a sostene na e Hydrogen Valley ubica na Groningen, Hulanda. Riba recomendacion di Groningen, e contacto cu Acciona Energia a wordo estableci. E bishita oficial di trabou na Spaña tambe a tuma lugar te cu mientras tanto e compania Acciona Energia a bin Aruba. Y manera e mandatario a anuncia den luna di MEI ultimo, Utilities y Acciona Energia a yega na un entendimento pa por sigui negocia e realisacion di Aruba Hydrogen Valley.

E acuerdo entre Spaña y Hulanda, apadrina pa Su Mahestad Rey Willem Alexander y Rey Felipe, ta yena e mandatario cu hopi orguyo pasobra cu e ta un confirmacion cu e caminda aki cu Aruba a encamina, ta e caminda di futuro, ta e caminda corecto pa Aruba. Y cu e compania cu cual Aruba ta negociando,



esta Acciona Energia di Spaña tambe ta esun corecto.

Mientras tanto opositornan Anti Aruba, ta purbando di kibra e iniciativa aki di Gabinete Wever Croes II, cu diferente relatonan den prensa contra e desaroyo aki, hasta un voicenote di un supuesto experto Spaño, purbando di bagatalisa e transicion energetico aki. Pa e mandatario tur e criticanan aki ta prueba cu ta canando e caminda corecto, cu e vision energetico ta esun corecto, cu Aruba Hydrogen Valley mester bira realidad.

E proyecto Aruba Hydrogen Valley ta pa Aruba, y no ta importa ta ken a logr'e pasobra e proyecto aki ta un logro pa Aruba, pa futuro di Aruba, un logro pa nos futuro generacionnan, lagando di awe caba un planeta limpi atras pa nan. E ta un fundeshi cu nos mester construi awo pa laga atras pa nos yiunan. Y ta awo nos mester hacie. Awo ta e momento. E futuro ta cuminsa awo.

E mandatario su soño ta cu Su Mahestad Rey Willem Alexander hunto cu Su Mahestad Rey Felipe di Spaña, hunto pone e prome piedra di Aruba su Hydrogen Valley. Cu e compromiso aki Minister Glenbert Croes ta traha pa sigui hiba Aruba dilanti.



RESUMEN DI SIMAN

Asuntonan General,
Innovacion,
Organisacion Gubernamental,
Infraestructura y
Planificacion Teritorial


PROME MINISTER, EVELYN WEVER-CROES

11 di juni - 18 juni 2023




• PERIODISTA PA UN DIA

Durante e di dos Conferencia di Prensa Hubenil di Periodista pa un dia 2023, 6 hoben a haya oportunidad pa haci nan pregutnanan na Prome Minister. E periodista invita pa splica e muchanan mas tocante e trabou di periodismo y prepara nan pa nan encuentro cu Prome Minister den e Conferencia di Prensa Hubenil tabata señor Patrick Everon.



• ART & SCIENCE FAIR MARIA COLLEGE MAVO

Maria College Mavo recientemente a organisa un "Art and Science Fair" den cual alumnonan di e scol a expone nan talento den ramo di ciencia, proyectonan di arte y di baile. Prome Minister Evelyn Wever - Croes a asiti e evento y a keda impresiona cu tur locual cu e hobennan a presenta.



• PARLAMENTO HUBENIL 20 AÑA

Parlamento Hubenil ya pa 20 aña ta preparando nos hobennan di 12 pa 23 aña, no solamente pa nan por bira un Parlamentario of Minister, sino pa nan ta bon prepara y bon representa pa cualkier oportunidad laboral of personal den futuro. Prome Minister a bin cu e iniciativa di invita Parlamento Hubenil pa bira un stakeholder hubenil oficial di Gobierno.



RESUMEN
DI SIMAN

Asuntunan General,
Innovacion,
Organisacion Gubernamental,
Infraestructura y
Planificacion Teritorial

PROME MINISTER, EVELYN WEVER-CROES



• BISHITA NA SCOLNAN, EDUTECH

Prome Minister a bishita diferente scol cu a ricibi fondo di e proyecto Edutech pa cumpra articulonan pa crea mas innovacion den enseñansa entre otro tablets y borchí digital. E scolnan cu a bishita ta: Colegio Bon Bini, Scol Preparatorio Aurora, Pius X School, Maria Goretti College, Colegio EPI y Educampus.



• WIND CREEK LONG TABLE

Recientemente a tuma luga pa di 5 año consecutivo e famoso "Long Table Event" organisa pa Wind Creek Aruba. E evento aki ta wordo organisa pa recauda fondo pa diferente fundacion den necesidad, pa por sigui traha debidamente yudando asina esnan mas vulnerabel na Aruba. Prome Minister a expresa di ta sumamente contento di mira con e comunidad di Aruba ta uni hunto pa asina contribui na yuda esnan cu tin mas mester.



• EVENTO EDUTECH NA JFK

E siman aki a tuma luga presentacion di un trayecto bunita cu ta andando den cuadro di e proyecto Edutech na JFK Education Center. E proyecto di Gobierno a traves di Futura ta encera 400 mil florin cu ta destina pa inverti den digitalisacion den enseñansa pa stimula habilidadnan di ciglo 21 cerca hobennan.

2023 AÑA DI

UNION  **Y POSITIVISMO!**

Gabinete Wever-croes II





• CELEBRACION 125 AÑA FILIPINA

Prome Minister ta felicita tur Filipino cu ta biba na Aruba y mundo henter cu e celebracion di nan di 125 año di independencia di Spaña. Den e ultimo 20 añanan na Aruba, riba e fecha aki, ta hisa e bandera di Filipina na Wilhelmina Park, acompaña pa un acto ceremonial protocolar.



• REUNIONNAN TWO ARUBA Y HULANDA

Den e siman di 22 di mei te cu 2 di juni, TWO-Aruba conhuntamente cu TWO-Hulanda a traha riba e agenda di ehecucion pa e di tres kwartaal di 2023. Durante bishita di trabou di TWO-Hulanda a para keto na diferente tema, entre otro: enseñansa, crecemento economico, reforma economico, mercado laboral y seguridad social.

JUNI 2023

Newsroom Business Employees Job Seekers Students Travelers Visas

U.S. DEPARTMENT of STATE

POLICY ISSUES COUNTRIES & AREAS BUREAUS & OFFICES ABOUT

Home > Reports > Office to Monitor and Combat Trafficking in Persons > 2023 Trafficking in Persons Report > Aruba

2023 Trafficking in Persons Report: Aruba

OFFICE TO MONITOR AND COMBAT TRAFFICKING IN PERSONS

IN THIS SECTION / ARUBA (TIER 2)*

LOCATION Aruba

Gal

• CONFERENCIA DI PRENSA CMMMA

E siman aki Prome Minister conhuntamente cu Minister di Husticia a anuncia cu despues cu Aruba tabata pa 3 año riba 'watch list' pa e situacion di traficacion di hende, Aruba su posicion a mehora y upgrade di puesto pa 'tier 2' esaki ta muestra di trabou duro haci pa combati y conscientisa comunidad tocante traficacion di hende.

Uni forsa y cu
positivismo
ta produci
beneficianan grandi
den diferente area pa
famianan, politica,
matrimonio, pais, etc
Hunto nos ta uza e
benificianan aki pa
engrandece nos mes
y Aruba.



2023

AÑA DI UNION Y POSITIVISMO!